

四庫全書

史部

欽定四庫全書

長安志卷十三

宋 宋敏求 撰

縣三

咸陽

咸陽縣

周畿今次畿自東微南至本府四十里

本周王季所都秦舊縣也

孝公十二年於渭北城咸陽自汧隴徙都焉三秦記曰

咸陽秦所都在九峻山南渭水北山水俱陽故名咸陽

李吉甫元和郡縣圖志山南曰陽水北曰陽謂之陽縣在北山之陽渭水之北故曰咸陽

秦自孝

公惠文悼武昭襄王始皇二世胡亥並都之始皇二十

六年一天下收天下兵聚之咸陽徙天下豪富二十萬

戶於咸陽

胡亥時閭樂為咸陽令

沛公元年秦三世子嬰降漢項

羽引兵西屠咸陽殺子嬰燒秦宮室火三月不滅漢高

帝元年更名新城七年罷入長安元鼎三年更曰渭城

縣屬右扶風王莽改曰京城後漢省入長安按秦咸陽

在今縣東二十里故城是也漢渭城縣亦沿於此前趙

石勒於渭城置石安縣秦苻堅於今縣東北長陵城置

咸陽郡後魏太和二十年徙咸陽郡於涇水北今涇陽縣是也隋開皇初郡廢九年改涇陽縣為咸陽十一年徙故咸陽城西三里屬雍州即秦之杜郵也大業二年省入涇陽唐武德元年復析涇陽始平置咸陽縣屬京兆郡寄治鮑橋三年徙白起堡六年又徙便橋西北即今縣也天授二年武后以其母順陵在縣界陞為赤縣神龍元年復為畿今為次畿

縣境

東西七十五里
南北四十八里

五鄉管五里

唐二十鄉有五雲鄉
長陵鄉餘皆不傳

河南鄉在縣南管資川里

平原鄉在縣北管平城里

安業鄉在縣北管介公里

龍首鄉在縣北管慶雲里

奉賢鄉在縣東管奉城里

縣城崇一丈五尺壕深九尺闊一丈二尺周四里

中橋鎮在縣東二十五里

陶化驛在縣郭下東去府四十里西去興平縣四十五里

臨臯驛在縣東南二十里

溫泉驛在縣西二十里今廢

渭河浮橋在漢渭城縣南北兩城中間架渭水上即漢之便橋也漢書曰武帝建元三年春初作便橋蘇林曰去長安四十里服虔曰在長安西北茂陵東去長安二十里顏師古曰便門長安城北面西頭門即平門也古

者平便皆同字於此作橋跨渡渭水以趨茂陵其道平
易即今所謂便橋是其處也便讀如本字唐末廢皇朝
乾德四年重修後為暴水所壞淳化三年徙置孫家灘
至道二年復修於此

元和郡縣圖志曰長安城西門曰便門北橋與門相對因號便橋

中渭橋在縣東南二十里本名橫橋架渭水上水經注
曰秦始皇作離宮於渭水南北以象天宮故三輔黃圖
曰渭水貫都以象天漢橫橋南渡以法牽牛渭水南有
長樂宮北有咸陽宮欲通二宮之間故造二橋廣六丈

南北一百八十步洞六十八柱七百五梁二百二十二
橋南北有隄立石柱柱南京兆主之柱北馮翊主之
有令丞各領徒一千五百人張釋之傳上行出中渭橋
張晏曰在渭橋中路漢末董卓入關遂燔之魏武帝更
造舊圖經曰劉裕入關又毀之後魏重造唐貞觀十年
廢三輔舊事曰漢承秦制造橫橋置都水令以掌之號
石柱橋水經注曰秦始皇造橋鐵鍛重不勝故刻石作
力士孟賁等像祭之鍛乃可移動也橋之北首疊石水

中舊有忖留神像此神嘗與魯班語班令其人出忖留
曰我貌醜卿善圖物容我不能出班於是拱手與言曰
出頭見我忖留乃出首班以脚畫地忖留覺之便還沒
水故置其像於水中惟背以上出水其後魏武帝重造
忖留之像因乘馬見之驚又命下之水中

中橋渡在縣東二十五里

安劉渡在縣東三十五里

兩寺渡在縣西十五里淳化三年廢

嘉麥渡在縣東三十五里

畢原在縣北詩曰終南何有有紀有堂毛註曰紀墓也
堂畢道平如堂也鄭註曰畢終南山之道名邊如堂之
牆然書序曰周公薨成王命葬公於畢劉向傳曰文武
周公葬於畢師古曰畢陌在長安西四十里三輔故事
曰文王武王周公皆葬畢陌南北春秋左氏傳曰王使
詹桓伯辭於晉曰我自夏以后稷魏駘芮岐畢吾西土也
蓋武王克商之後以其地封文王次子又曰畢原鄠郇文

之昭杜注曰畢在長安西北關中記曰高陵北有畢原

陌謂此原之陌也秦記曰池陽原漢長坂

元和郡縣圖志曰畢原即

縣所理原南北數十里東西二三百里無山川陂湖井深五十丈亦謂之畢陌漢朝諸陵並在其上下又名石安原即在石勒置石安縣之所按石安原見涇陽

矩陰原在縣西南二十里

渭水西自興平界來流入高陵縣界

豐水在縣西十一里自長安縣界來流至宋村合入渭

水經注曰渭水又東與豐水會于矩陰山內其水緣南

山郊水合流

馬跑泉在縣西二十五里

要冊泉在縣北八里

下村泉在縣西北一十五里

李村泉在縣西北一十里

蘭池陂即秦之蘭池也在縣東二十五里

周氏陂周十三里舊圖經曰漢周勃家在此其子亞夫有功遂賜此陂故地以氏稱之長安圖曰周氏曲在咸

欽定四庫全書

長安志
卷十三

六

陽縣東南三十里李善曰今周氏陂陂南一里有漢蘭池宮

興成渠在縣西十八里唐李石為相奏令咸陽令韓遼治之東建永豐倉自秦漢以來䟽鑿為漕渠起咸陽抵潼關三百里無車輓之勞其後堙廢自此復之

細柳倉在縣西南三十里漢舊倉也文帝後六年周亞夫為屯將軍次細柳服虔曰在長安西北如淳曰長安細柳倉在渭北近石徼張揖曰在昆明池南今有柳市

是也師古曰匈奴傳云置三將軍軍長安西細柳渭北
棘門霸上此則細柳不在渭北揖說是也三輔故事曰
周亞夫軍於細柳今石徼是也石徼西有細柳倉城東
有嘉禾倉樊噲傳柳中即細柳地也在長安西

按石徼
亦作石

墩

棘門在縣東北十八里漢文帝後六年徐厲為將軍次
棘門孟康曰在長安北秦時宮門也如淳曰三輔黃圖
棘門在橫門外

杜郵亭在縣西南三十八里白起自刎之處水經注曰
杜郵亭在咸陽西十七里今名孝里亭中有白起祠三
秦記曰長安城西有九峻山西有杜山又有畢陌西北
有孝里西有白起墓杜預曰畢國在西北

杜郵館在古縣城東

曲郵在縣境漢書高帝征黥布張良送至曲郵

交道廐去長安六十里近延陵

秦咸陽故城在縣東二十里漢渭城亦治於此隋故縣

城在縣東二十二里渭水北即秦之杜郵其城周八里
唐故縣城在渭河北杜郵館西城崇一丈五尺

祥谷水合豐水

白谷水合豐水

聖女泉出縣西二十里昆明池北平地上周十步西北

流五十步與牧猪泉合

圖經曰水池在縣西北五里按
十道志長安西有灋池亦名聖

女泉蓋灋池

水相近也

野韭澤即漢牛首池也在縣西北三十八里

漕河在縣南十五里自萬年縣界來經縣界五里入于渭漢書武帝元光六年春穿漕渠通渭

龍首渠在漢東北五里自萬年縣界流入注于渭

明渠漢時渠也水經注曰在長樂宮桂宮之間

清渠在縣西五十里自鄠縣界來經縣界一十里流注于渭

漆渠在縣西南二十里舊自縣之圻河分水經縣界二十里入漕河漢書曰穿此渠通漆水故曰漆

括地志曰胡亥築阿

房宮開此渠而
運南山之漆

永安渠隋文帝開皇三年開在縣南引交水入宮之北

門唐明皇自蜀還京肅宗至望賢宮迎明皇帝親寵馬行數十步執鞭弭道過渠入宮

唐望賢宮在縣東數里開遠門內

善因寺唐穆宗由複道幸咸陽止於此寺

周文王廟二處一在縣西一在縣東相去各十五里

武王廟在縣北五里

成王廟在縣西十五里

康王廟在縣北七里

漢呂太后廟在縣東北三十五里

景帝廟在縣東北十五里

武帝廟在縣東北八里

介子推廟在縣西北三十五里

武安君秦將白起廟在縣五里

四皓廟在縣東二十五里

漢高帝時人
商山隱士也

漢鄼侯蕭何廟在縣西三十里

周文王陵在縣北十五里書序曰周公薨成王葬於畢
註曰不敢臣周公故使近文武之墓孟子曰文王生於
岐周卒於畢郢註書曰太子發上祭于畢下至於盟津
畢文王墓近鎬也漢書劉向傳曰文武周公葬于畢師
古曰畢陌在長安西

惠帝安陵在縣東三十五里

元和郡縣圖志陵在縣東北二十里

臣瓚曰

在長安北三十五里三輔黃圖曰去長陵十里關中記
曰徙關東倡優樂人五千戶以為陵邑善為詠調故俗

稱安陵冢也

四皓墓在安陵西

張敖塚在安陵東三十里

塚上有五岳之像
今人謂之五岳塚

景帝陽陵在縣東十五里

元和郡縣圖志曰
陵在縣東四十里

漢書曰景

帝五年作陽陵邑後三年葬陽陵臣瓚曰陵在長安東

北四十五里帝王世紀曰陽陵山方一百二十步高四

十丈

昭帝平陵在縣東北一十三里漢書曰帝作陵制令通流

水而已石槨廣一丈二尺長二丈五尺無作墳陵東北作廡長三丈五步外為小厨裁足祠祀萬年之後掃地而祭臣瓚曰陵在長安東北

元帝渭陵在縣東北一十三里臣瓚曰陵在長安北五

十六里

王莽遣使壞渭陵園門泉池曰無使民復思漢氏也

成帝延陵在縣西北十五里漢書曰成帝葬延陵在扶風去長安六十二里關中記曰延陵在長安西北四十里渭陵之東延陵是也成帝起延陵城邑以成言事者

以為不便乃更造昌陵在霸城東二十里運沙渭濱取
東山土東山土與粟同價所費巨億數年而陵不成谷
永等奏昌陵積土為高山陵寢猶在實土之上浮土之
下非永年之基延鄉之地居高臨下道貫二州二十餘
縣宜還就延鄉乃遣衛尉淳于長行視長奏宜如永等
議乃徙延陵而棄初言者將作大匠郭萬年於燉煌配
役三輔舊事曰成帝作延陵及起廟竇將軍有青苗地
在廟角恐犯蹈之故言作陵不便乃徙昌陵取土東
山下土與粟同價

哀帝義陵在縣西八里漢書臣瓚曰義陵在右扶風去
長安四十六里

平帝康陵在縣西二十五里漢書臣瓚曰在長安北六
十里舊圖經曰康陵在興平原口

漢傳太后廢陵水經注曰在霸城西北王莽奏毀其陵
今本處積土猶高謂之增屏又謂之增埠

唐世祖元皇帝興寧陵在縣東三十五里五雲鄉周五
里

承天皇帝順陵在縣東北二十五里長陵鄉周二里

此陵

乃武后之父母也

追贈皇帝皇后

周太公廟在縣東二十五里周尚父齊太公呂望也鄭
玄曰太公受封于齊留為太師五世之後乃歸葬於齊
周公墓在縣東北三十里

漢蕭何墓在縣東北三十七里

曹參墓在縣東北三十五里

張良墓在縣東北三十六里留侯陪葬長陵與高祖長

陵相去五里

揚雄墓按揚雄家誄曰子雲以天鳳五年卒詔陪葬安陵阪上弟子鉅鹿侯芭負土作墳號曰玄塚

順陵在縣東北三十里唐武后追尊其母曰孝明皇后號順陵

長安志卷十三

欽定四庫全書

長安志卷十四

宋 宋敏求 撰

縣四

興平 武功

興平

興平縣

唐畿今次畿東至府九十里

本周犬丘之地帝王世紀曰周

懿王二年王室大衰自鎬徙都犬丘今槐里也史記秦之先大駱生非子居犬丘秦名曰廢丘項羽封章邯為

雍王都廢丘漢高帝三年改曰槐里縣莽曰槐治今縣北故城是屬右扶風武帝析置茂陵縣王莽曰宣城昭帝又析置平陵縣屬右扶風王莽曰廣利今縣東二十里咸陽縣界平陵古城是魏黃初元年改平陵為始平縣因原以名之晉太始二年置始平郡領槐里始平武功鄠鵲城五縣苻堅徙始平於茂陵故城後魏太武太平真君七年省始平郡縣入扶風郡焉孝莊帝永安元年又徙縣於今縣東北一十五里

平道志曰永安元年移扶風郡於文學城

領槐里始平藍
屋三縣屬雍州

恭帝元年又徙今縣東北二十五里後

周宣帝大象二年復徙今縣東南十里文學城隋開皇
三年隸京兆郡大業九年徙於今治唐天授二年隸稷
州大足元年還隸雍州景龍四年金城公主降吐蕃贊普
中宗送至縣因改為金城徙於馬嵬故城至德初置興
平軍二載改為興平縣

縣境

東西五十里
南北六十里

六鄉管二百二十村

唐二十鄉有扶風
鄉湯祠鄉餘不傳

被化鄉在郭下管村四十

耿祠鄉在縣西三里管村四十

零保鄉在縣東三里管村四十

文渭鄉在縣南五里管村三十六

保安鄉在縣東北五里管村三十六

崇節鄉在縣北三里管村二十八

縣城周七里餘二百步崇二丈隋大業九年築六門槐里驛在郭下東至咸陽驛四十五里西至武功驛六十

五里

馬嵬驛在縣西二十里今廢

石橋在縣西二十里馬嵬店

龍光渡在縣西南三十五里

渭水上

始平原在縣北一里東西五十里南北八里東入咸陽界西入武功界三秦記曰長安城北有始平原數百里其人井汲巢居井深五十丈漢時亦謂之北芒巖西京雜記曰茂陵富人袁廣漢藏錙巨萬家僮九百人於北

芒巖築園東西四里南北三里激流注其內構石為山高十餘丈連延數里養白鸚鵡紫鴛鴦旄牛青兕廣漢後有罪誅沒入官為園鳥獸草木皆徙植上林苑又曰何武葬於北芒龍薄坂

王嘉冢在東北一里

渭水南去縣二十九里自武功縣界來潞水注之入咸陽縣界

玉女泉在縣東南

史家泉在縣北楊妃故冢西

板橋泉在縣西北一十七里深百尺流入白渠後魏地
形志曰槐里縣有板橋泉

龍泉亦名溫泉又名姜子泉在縣西一十七里周數十
步深不可測

涇龍泉新泉相去十餘步在縣西一十七里周數十步
流入白渠

馬嵬泉在縣西二十里周數十步深百尺流入白渠

靈寶泉在縣東南二十里周數十步深不可測舊圖經
曰漢帝時邊韶得靈寶符于此泉後祈晴有靈因名之
醴泉在縣東南二十里周數十步深不可測舊圖經曰
醴泉在扶風鄉唐貞觀十二年自然湧出其味如醴飲
之疾愈

成國渠在縣北一里西自武功縣界流入縣界凡六十
里溉田二百四十餘頃東流入咸陽縣界即古白渠也
水經注曰成國故渠故魏尚書右僕射衛臻征蜀所開

也上承沂水於陳倉東過郿及武功槐里縣

按唐石記咸通

十三年夏四月戊子京兆府奏修六門堰畢其渠合章川莫谷香谷武安四水溉武功興平咸陽高陵等縣田二萬餘頃俗號渭白渠言其利與涇白相上下又曰成國渠見漢書地理志元魏時僕射衛臻征蜀復開以溉田大統十三年魏始築堰置六斗門以節水貞觀中役九州大匠沈鐵牛鐵劍以禦魑魅始就其功永徽四年右僕射于志寧治之尋於聖歷中勅稷州刺史張知謩修焉始通武安水久視元年副西京留守雍州長史薛季昶得許公推者縛土牛以殺水勢春官郎中薛稷刻石叙之咸通十一年七月咸陽縣民薄達等上言六門淤塞緣渠之地二十年不得水耕耨而其官歲以水籍為稅請假錢二萬八千九百八十貫以為修堰工作之費候水通流追錢各戶以還京兆府為之奏乃詔借內藏錢以充命中使董其事又令本縣官專之後記役凡

用萬萬千

絡云今涸

昇原渠在縣南一十五里西自武功縣流入縣界凡六十里溉田七十餘頃東流入咸陽其原出汧水自鳳翔號縣城西北原流至武亭合流數里西南至六門堰東成國渠合流西南出縣界以其昇原而流故名之唐垂拱初連岐隴水今涸

普濟渠在縣南一十里自武功縣流入縣界凡六十里溉田七十餘頃東流入咸陽今涸

清渠在縣南二里東流入咸陽縣界

馬牧澤在縣東南二十里南北廣四里東西二十一里
百頃泊在縣西二十五里周一十六里今時在縣西二十
里周十四里

曲泊在縣西南十五里

百頃泊而下並有蒲魚之利邑人利焉隋開皇十五年各築隄

防護

浪井在耿祠鄉唐貞元五年自然湧出有疾者飲之皆
得愈遠近汲取朝夕如市

章邯臺在縣東南十里

石星晉穆帝太和中隕于槐里

槐里故城即犬丘城在縣東南一十里周十二里崇二丈五尺晉太康中始平郡治也其城遶帶防陸舊渠尚存即漢書所謂槐里環隄者也晉灼曰統環槐里隄者是也

小槐里李奇曰即槐里之西城也東已有槐里城故以此城為小槐里魏志太祖以陽阜為武都太守以武都

孤遠欲移之人多戀土然阜威信素著前徙人在京兆扶風天水界者萬餘戶於是徙郡於小槐里百姓襁負隨之

茂陵故城在縣東北一十九里周三里三輔舊事曰武帝於槐里茂鄉徙戶六萬一千置茂陵縣屬右扶風舊圖經曰徙茂陵城蓋苻堅時也魏恭帝末年徙於金城

十道

志曰舊志茂陵宣帝置按武帝時已徙戶居之至宣帝時為縣

文學城在縣東崇二丈五尺十道志曰今謂之故縣城

武學城在縣東一十里崇二丈五尺與文學城相接二城並秦章邯築

樊噲城在縣南一十里崇一丈西京記曰漢王襲雍章邯敗走廢丘城命將軍樊噲圍之於城西築臺以望之

今縣西南有武延臺疑是焉

馬嵬故城在縣西北二十三里孫景安征遼記曰馬嵬人名於此築城以避難未詳何代人姚萇時扶風王駢以數千人保馬嵬故城

漢黃山宮在縣西南三十里

隋仙林宮在縣西十八里文帝置

登真觀在縣西南一里半唐垂拱元年置

天興觀在縣東北一里景龍元年置

要冊廟在縣北一里

露膊將軍廟在縣西北五里

商湯祠在縣西北二十里湯祠鄉

漢武帝龍淵故廟在縣東北一十七里

龍淵廟在縣東北二十四里武帝廟也

漢武帝茂陵在縣東北十七里武帝建元二年置茂陵

邑後元二年葬

師古曰本槐里縣之茂鄉故曰茂陵臣瓚曰茂陵在長安西北八十里

元

帝初元三年四月乙未孝武園白鶴館災園中五里馳

逐走馬之館

師古曰五里者言其周四五里

不當在山陵昭穆之地

關中

記曰漢諸陵皆高十二丈方一百二十步惟茂陵十四丈方百四十步徙民置縣者凡七長陵茂陵各萬戶餘五陵各五千戶陵縣屬太常下隸郡也守陵溉樹掃除凡五千人陵令屬官各一人寢廟令一人園長一人門史三十三人候四人元帝時三輔七十萬戶始斷不復徙人陪陵渭陵延陵義陵皆不立銘漢帝諸陵自各立

廟或在城內或在城外或在陵傍又陵下園中有寢室有便殿日祭於寢月祭於廟時祭於便殿寢日四上食廟歲二十五祠於便殿又祭于遊衣時至元帝始正迭毀禘祫之制唯祖宗之廟世世不毀餘五廟親盡而毀四時祭於廟除諸寢園不除衣冠之遊其後或廢或興至於王莽漢武故事曰帝見形謂陵令薛平曰吾雖失勢猶為女君奈何令吏卒上吾陵上磨刀劍乎自今已後可禁之平頓首謝因不見往問陵旁果有方石可以為礪吏卒嘗盜磨刀劍霍光欲斬之張安世曰神道茫昧不宜為法乃止故阮公詠懷詩曰失勢在須臾帶劍上吾陵

李夫人墓亦名望仙臺二十丈周二百六十步在縣東北十六里三輔黃圖曰李夫人墓東西五十步南北六

十步高八丈茂陵西北一里俗名英陵水經注曰李夫人塚塚形三成世謂之英陵

霍去病墓在縣東北十九里崇二丈漢書曰病為驃騎將軍大司馬冠軍侯元狩六年薨上悼之發屬國玄甲軍陳自長安至茂陵為冢象祁連山師古曰在茂陵旁冢上有豎石一冢前有石人馬者是

衛青墓在縣東北十五里崇二丈漢書曰青為大將軍大司馬長平侯尚平陽主元封五年薨與主合葬起冢

象廬山云師古曰在茂陵東次去病冢之西相併者是
原氏阡漢書原涉自以先人墳墓儉約乃大治起冢舍
初武帝時京兆尹曹氏葬茂陵民謂其道為京兆什涉
慕之買地開道立表曰南陽什人不肯從謂之原氏什
四馬務在縣東南二十餘里從東第一曰飛龍務次大
馬務次小馬務次羊澤務地凡三百七十一頃南渡渭
河慶厯中為營田尋罷之其後民占佃簿籍亡散不復
歸於有司

武功

武功縣

唐畿今次畿東南至府一百四十里

古有郃國堯封后稷之地周

平王東遷以錫秦襄公孝公作四十一縣釐美陽武功

各其一也武功蓋在渭水南郿縣地是

按漢書右扶風有釐有郿有武

功今此縣舊文釐美陽武功各為縣而又云縣在郿縣地疑釐郿美陽後皆入武功耳

左傳周景

王使桓伯讓於晉曰我自后稷駘芮岐畢吾西土也杜

注云郃在始平武功縣郃地是也廟記曰武功本名郃

後改名釐城闕駘十三州志曰釐古文作郃古今字異

耳舊縣境有武功山斜谷水亦曰武功水是則縣本以山水立名也漢屬右扶風王莽曰新光後漢省永平八年復自渭水南徙武功縣於故葭城任安以武功小邑無豪易高故名武功晉屬始平國後魏太和十一年改為美陽又置武功郡兼領美陽莫西二縣屬岐州後周孝明帝武成二年以武功郡屬雍州武帝建德三年省武功郡美陽縣自此以前皆治葭城今西南二十二里故葭城是後復立武功縣於今治所中亭川唐武德三

年分雍州之武功好時蓋屋郿州之郿四縣於今治置
稷州因后稷所封為名又析始平置扶風縣四年以岐
州之圍川隸之七年以郿隸岐州貞觀元年廢州省扶
風以圍川鳳泉隸岐州蓋屋武功隸雍州天授二年復
為稷州領武功奉天始平蓋屋好時等五縣大足元年
廢稷州縣復隸京兆後唐同光中隸鳳翔長興元年還
屬京兆府

縣境

東西四十六里
南北五十里

四鄉管四里

唐一十四鄉有中水鄉餘不傳

高望鄉在縣東管望鄉里

周源鄉在縣南管懷德里

節婦鄉在縣東南管顯陽里

義門鄉在縣北管順義里

縣城周三里二百二十步崇九尺上闊一尺五寸下闊四尺五寸

太乙山在縣東漢書古文以為終南

垂山在縣東漢書古文以為惇物

太白山三秦記曰太白山在縣南去長安二百里不知
高幾許俗云武功太白去天三百山下軍行不得鳴鼓
角鳴鼓角則疾風暴雨兼至也周地圖記太白山甚高
上常積雪無草木半山有橫雲如瀑布則澍雨人常以
為候驗之如離畢焉故語曰南山瀑布非朝即暮水經
注曰太白山南連武功山於諸山最為秀傑冬夏積雪
望之皓然魏略曰吉茂蘇則值亂隱於扶風南太白山

中以經籍自娛

三時原在縣西南二十里崇五十丈西入扶風縣界雍水十道志曰俗名白水亦曰圍川水西北自扶風縣界流入

溫泉水出太乙山其水沸湧如湯水經注杜彥達曰可治百病池清則疾愈池濁則無驗其水下合溪流北注渭白渠在縣南一十三里西魏大統十三年置入興平

縣今無基址

隋志有永曹渠
晉濟渠

成國渠注渭水在縣境

五泉渠十道志曰西自岐州扶風縣界流入渠經三時原上東流經縣西南去縣十二里隋文帝葬原上因絕此水又東合成國渠

六門堰十道志曰西魏文帝大統十三年置六斗門節水因名之

陂池在縣北二十里義門鄉

釐亭新論曰郃在縣西其民有會日約相與夜中市如

不為則有災咎後漢書曰王忭字少林除郿縣令到官
至釐亭亭長曰亭有鬼數殺過客不可宿也忭曰仁勝
凶邪德除不祥何鬼之避即入亭止宿夜中聞女子稱
冤之聲忭曰有何枉狀可前求理乎女子曰無衣不敢
進忭便投衣與之女子乃前訴曰妾夫為涪令之官過
宿此亭亭長無狀枉殺妾家十餘口埋在樓下悉盜取
財貨忭問亭長姓名女子曰即今門下游徼者也忭曰
汝何故數殺過客對曰妾不得白日自訴每夜陳冤客

輒眠不見應不勝感恚故殺之忱曰當為汝理此寃勿復害良善也因解衣於地忽然不見旦召游徼詰問具伏罪即收繫及同謀十餘人悉伏辜遣吏送其喪歸鄉里於是亭遂清

孝義臺在縣北二十里義門鄉

故蘧城一名武功城在今縣西南二十里周邵國也周城在美陽城西北中水鄉周大王所居邑也詩曰古公亶父來朝走馬率西水滸至于岐下又曰周原膴膴董

荼如飴爰契我龜築室於茲帝王世紀曰周大王避狄
循漆水踰梁山徙邑於岐山之陽今扶風美陽西北有
岐陽城舊周地也

美陽故城在縣西七里漢書曰美陽縣屬右扶風注周
大王所邑有高泉宮秦宣太后所起後魏太和十一年
廢

慶善宮在縣南一十八里神堯之舊第也太宗降誕
之所南臨渭水武德元年建武功宮六年改慶善宮貞

觀六年太宗臨幸讌羣臣賦詩後廢為慈德寺

武太后行宮在縣東五里高望鄉

上武亭川東原至興平縣西界三十五里

上武亭川西原至鳳翔府扶風縣東界一十一里三百
二步

高望川在縣東二十五里

渭水自鳳翔府扶風縣來入縣界水經曰渭水東經武
功縣北

斜水漢書出衙領山北至郿入渭水經注曰出縣西南衙領山北歷斜谷過五丈原東原在縣西十餘里水出武功縣亦謂之武功水諸葛亮表遣虎步監孟琰據武功水東司馬懿因阻水出騎萬人來攻琰營亮作車橋懿見橋垂成便引兵退後漢志引西征賦注曰褒斜谷在長安西南南口褒北口斜長百七十里其水南流褒水漢書亦出衙領山至南鄭入沔

武亭水北自好畤縣來至縣南立節渡合渭水白水本

名雍水亦曰圍川水西自扶風縣界來至縣合武亭水
莫谷水水經注曰莫谷水南經美陽縣與中亭川水相
合舊圖經曰自奉天縣界一十里流至縣東北合武亭
水十道志曰三時原莫谷水南經武功縣北

乘本寺在縣西北一里本唐神堯宅太中元年建為報
本寺

寶意寺在縣西一里亦唐神堯別宅乾封三年建為寶
意寺周顯德二年改重恩寶意寺寺東臨絕崖

垂山斜水涯有祠三所

后稷祠在縣西南二十二里

姜嫄祠在縣西南二十二里

隋文帝太陵在縣西南二十里三時原

唐哀帝陵在縣西原上

漢蘇武墓在縣北一十里義門鄉按郡國志蘇武冢在
好時縣東三十里里名守節鄉與此地里相接

長安志卷十四

欽定四庫全書

長安志卷十五

宋 宋敏求 撰

縣五

臨潼 鄠

臨潼

臨潼縣

唐次赤今次畿西至府五十里

本周驪戎國春秋時晉獻公伐

驪戎其後秦滅之為驪邑漢書高祖七年置新豐縣

應劭

曰太上皇思東歸於是高祖改築城寺街里以象豐徙豐民以實之故號新豐三輔舊事曰太上皇不樂關中

思慕鄉里高祖徙豐沛屠兒酤酒賣餅商人立為新豐
西京雜記曰高祖既作新豐并移舊社街巷棟宇物色
如舊士女老幼相慶路首各知其室放犬羊雞鴨於通
衢亦競識其家匠人朝寬所為也移者皆喜其似而憐
之故競加賞贈月餘致累百金別本曰太上皇徙長安
居深宮悽愴不樂高祖竊因左右問故以平生所好皆
屠販少年酤酒賣餅鬪雞蹴踘以為歡今皆無此故不
樂高祖乃作新豐移諸故人實之太上皇乃悅故新豐
多無賴無衣冠子弟故也高祖少時
常祭粉榆之社及移新豐亦立焉 郡國縣道記曰今

縣東十三里故新豐縣西南四里新豐故城即高帝為
太上皇所立後漢靈帝末徙安定郡陰盤縣寄治於此
城今亦謂之陰盤城後魏太和九年徙陰盤縣於今縣

東三十二里冷水西戲水東司馬村故城是其新豐縣
自陰盤寄治後又徙於故城東三十里蓋在零水側周
閔帝元年又徙於天寶廢新豐縣東南七里隋大業七
年又徙於天寶中廢縣所治垂拱二年以縣東南三十
里有山踴出改為慶山縣天授二年於縣界零口置鴻
州析慶山渭南兩縣置鴻門縣以慶山高陵櫟陽渭南
五縣隸焉久視元年廢州并鴻門縣神龍元年復改慶
山為新豐縣開元後玄宗每歲十月幸溫湯歲盡而歸

以縣去湯泉稍遠天寶四載析新豐萬年二縣於溫泉

旁置會昌縣於今治以山名名之又升為赤縣

六載發
馮翊華

陰丁夫築會昌羅城於溫
湯所置百司及公卿邸第七載省新豐改會昌縣改山

曰昭應

鄭嵎津陽門詩注曰時有詔改新豐為會昌縣
移自陰盤故城置于山下至明年十月老君置

于朝元閣而於其處立降聖觀改新豐為昭應
縣麻宇始成令大將軍高力士率禁樂以落之皇朝大

中祥符八年避玉清昭應宮名改縣為臨潼

縣境

東西五十五里
南北四十里

三鄉管一百一十六村

唐十八鄉

旌儒鄉在縣西南管村三十九

會德鄉在縣東南一十里管村三十六

潤渭鄉在縣東四十五里管村四十一

零口鎮在縣東四十里

昌亭驛在縣西南五十步東至華州渭南縣驛八十里

西至本府秦州驛五十里南至藍田縣七十里北至櫟

陽縣三十五里

戲水驛兩京道里記曰大業六年置在戲水店驪山在

縣東南二里驪戎來居此山故以名按土地記曰即藍田山也溫湯出山下其陽多寶玉其陰多黃金三秦記始皇作閣道至驪山八十里人行橋上車行橋下今石柱猶存山上立祠名曰靈臺述征記曰長安東則驪山西則白鹿原北望雲陽悉見山阜之形而恒若雲霧之中天寶元年更驪山曰會昌山七載又改曰昭應山山神曰玄德公

水經曰浮胗山蓋驪山之麓而有異名一作胗浮

慶山在縣東南三十五里唐垂拱二年踴出

譚賓錄曰新豐縣因風雷

有慶山踴出高二百尺荊州人俞文俊詣闕上書曰臣聞天氣不和而寒暑併人氣不和而疣贅生地氣不和而堆阜出今陛下以女主處陽位反易剛柔故地氣隔塞而山變為災陛下謂之慶山臣以為非慶也疏奏天后大怒放之于嶺外兩京道里記曰慶山百餘尺居守以間百寮畢賀給事中魏叔璘曰地生骨堆何足可慶或以上間坐賜死識者謂叔璘竊語是以被戮故禍不及家止身而已

鴻門坂在縣東十七里漢舊大道北下坂口名也關中

記曰鴻門在始皇陵北十里新豐縣漢書沛公會項羽

處又文帝登霸陵指新豐路示慎夫人曰此是北走邯

鄲道也又亭尉呵李廣處續漢書郡國志新豐縣東有鴻門亭坑儒谷在

縣西南五里秦始皇坑儒於驪山下故名坑儒鄉漢書注師古曰今新豐縣溫湯之處號愍儒鄉溫湯西南三里馬谷谷之西岸有坑古老相傳以為秦坑儒處也衛宏詔定古文官書序云秦既焚書患苦天下不從所改更法而諸生到者拜為郎前後七百人乃密令冬種瓜於驪山坑谷中溫處瓜實成詔博士諸生說之人人不同乃命就視之為伏機諸生賢儒皆至馬方相難決因發機從上填之以土皆壓終乃無聲此則閔儒之地

其不謬矣唐天寶中改為旌儒鄉立旌儒廟

賈至作碑

磴千谷在縣西南七里

鳳皇原後漢延光二年鳳皇集新豐即此原也亦驪山之別麓唐韋嗣立構別廬於驪山鳳皇原鸚鵡谷有重

崖洞壑飛流瀑水中宗臨幸改為清虛原幽棲谷

唐書曰新

豐鸚鵡谷水清相傳云此水清天下平開皇之初暫清尋濁至是而復清

很石在縣東十里秦始皇陵東南二里形似龜初始皇之葬遠採此石將致之驪山至此不復動石崇一丈八

尺周十八步

渭水在縣北十里西自萬年縣界來東入渭南縣界冷

水一作零在縣東三十五里來自渭南縣界亦曰百丈水

水經注曰冷水出肺浮山歷陰盤新豐兩原之間北流

注於渭

戲水在縣東二十七里漢書曰陳涉之將周章西入關

至戲秦將章邯距破之應劭曰戲弘農湖縣西界也孟

康曰水名也蘇林曰在新豐東南三十里師古曰戲在

新豐東今有戲水驛其本出藍田北界橫嶺至此而北
流入渭孟蘇說是應說失之戲許宜反水經注曰泠水
出浮肺山戲水出驪山鴻谷鴻一作馮又北歷戲亭東即周
幽王死處兩京道里記曰戲水周幽王以褒姒遊於此
故以為名水至濁北流入渭東西有店南去昭應縣二
十九里

陰盤城河水在縣東北一十四里出縣北楊村社魚池
水在秦始皇陵東北五里周四里水經注曰泉出驪山

本導源北流始皇葬於山北水過而曲行東注北轉初造陵取土其地汙深水積成池謂之魚池

市谷水在縣東三十里流入渭

蘄澄泉在縣西南五里

蘄從緣切雨面泉出也

鳴犢泉在縣西北一十里

石澗河在縣西二里

水碓河在縣西五里

王橋河在縣東三十里流入渭

蝎蛭井在縣東北上七里官道側井旁有迴道縈繞及于水次

溫湯在縣南一百五十步驪山之西北雍州圖曰溫湯在新豐縣界溫谷即溫泉也三秦記曰驪山湯舊說以三牲祭乃得入可以去疾消病不爾即爛人肉俗云始皇與神女戲不以禮神女唾之則生瘡始皇怖謝神女為出溫泉而洗除後人因以為驗漢武帝故事曰驪山湯初始皇砌石起宇至漢武又加修飾焉張衡賦序曰

余適驪山觀溫泉浴神井嘉洪澤之普施十道志曰今按泉有三所其一處即皇堂石井周武帝天和四年大冢宰宇文護所造隋文帝開皇三年又修屋宇列樹松栢千餘株貞觀十八年詔左屯衛大將軍姜行本將作少匠閻立德營建宮殿御賜名湯泉宮太宗因幸製碑咸亨二年名溫泉宮

唐年小錄曰開元十年置溫泉宮實錄與元和郡縣圖志曰開元十

一年初置溫泉宮

天寶六載改為華清宮驪山上下益治湯井

為池臺殿環列山谷明皇歲幸焉又築會昌城

是歲發馮翊華

陰等郡丁夫築會昌羅城即於湯所置百司及公卿邸第焉華清宮

北向

正北門外有左右朝堂門宇相對有望仙橋北有左右講武殿

正門曰津陽門宮北

門之內曰津陽門門外有弘文館以下見津陽門詩注及今所在迹

東面曰開陽門宮之東面

正門也門外有宜春亭

西面曰望京門

宮之西面正門也門外近南有御交道上嶺通望京

樓南面曰昭陽門

宮之南面正門也今謂之山門門外有登朝元之路本唐之御輦便路也

津陽門之東曰瑤光樓

南有小湯有其南曰飛霜殿寢殿也白少傳以長

生殿為寢殿非也

御湯九龍殿

在飛霜殿之南

亦名蓮花湯

明皇雜錄曰玄宗幸

華清宮新廣湯制作宏麗安祿山於范陽以白玉石為魚龍鳧鴈仍以石梁及石蓮花以獻雕鐫巧妙殆非人

功上大悅命陳於湯中仍以石梁橫互湯上而蓮花鏡
出水際上因幸華清宮至其所解衣將入而魚龍鳧鴈
皆若奮鱗舉翼狀欲飛動上甚恐遽命撤去而蓮花今
猶存又嘗於宮中置長湯數十間屋環回甃以文石為
銀鏤小船及白香木船置於其中至於檣棹皆飾以珠
玉又於湯中壘瑟瑟及沉香為山以狀瀛洲方丈津陽
門詩注曰宮內除供奉兩湯外而內外更有湯十六所
長湯每賜諸嬪御其修廣與諸湯不侔甃以文蟲密石
中央有玉樽捧湯泉噴以成池又縫綴錦繡為鳧鴈置
於水中上時於其間泛銀鏤小舟以嬉游焉次西曰太
子湯又次西少陽湯又次西尚食湯又次西宜春
湯又次西長湯十六所今唯太子少陽二湯存焉
玉女殿今名星辰湯南有玉女殿北有虛閣
閣下即湯泉二玉石甃湯所出也
七聖殿殿在宮中自神
堯至睿宗昭成肅明皇后皆立衣衾衣繞殿石榴皆太
真所植南有功德院其間瑤壇羽帳皆在焉順興影堂

果老藥室
亦在禁內
宜春亭
在開陽門外
重明閣
今四聖殿北
臨高有

境如在諸掌
閣下有小池
中植蓮荷池
四聖殿
重明之

東鑿井每盛夏
泉極甘冷
邑人汲之
聖殿殿東
長生殿
齋殿也
有事於朝
元閣即齋沐此殿

有惟栢
沙洞玉築峯
皆玄宗為名
洞居殿之左
玉築峯上有
王母祠
實錄天寶元
年新作長生
殿集靈臺以
祀神集

靈臺朝元閣
天寶七載
玄宗皇帝見
于朝元閣即
改老

君殿
朝元閣之南
玉石為鐘樓
在朝元閣之
東明珠殿
長生殿

東第殿
殿側有魏溫
泉堂碑其石
瑩觀風樓
樓在官外

夾城而達于
內前驅馳道
周視山川
鬪雞殿
在觀風樓
之南按

歌臺

在闕雞殿之南
臺南臨東繚牆

毬場

宜春亭之北門外曰小毬場
其西曰小毬場

連理木

飲鹿槽丹霞泉

並在朝元閣之南

羯鼓樓

朝元閣之東近南繚牆之外

祿山

亂後天子罕復遊幸唐末遂皆圯廢晉天福中改為靈

泉觀賜道士居之

安幕邸兩京道里記曰相傳漢高祖幸新豐安營幕於此

粉榆社漢書曰高祖禱豐粉榆社張晏曰粉白榆社在豐東北十五里

謝聚關中記曰在始皇陵北十餘里

鴻門亭在縣東七里

曲郵亭張良追漢高祖處

步昌亭三輔黃圖曰成帝於霸陵北步昌亭起昌陵即武帝之廢陵也

驪戎故城在縣東二十四里殷周時驪戎國城也兩京道里記曰城高一丈五尺周四里

幽王城一名幽王壘在縣東南戲水上城高八尺周二

百八十步

兩京道里記在縣東北四十里

國語曰幽王滅于戲蘇林曰

戲邑名也在新豐縣東南三十里戲亭是也史記曰褒姒不好笑幽王為烽燧大鼓有寇至舉烽火諸侯悉至至而無寇褒姒乃大笑幽王欲悅之為數舉烽火其後不信諸侯諸侯益不至犬戎共攻幽王幽王舉烽火徵兵兵莫至遂殺幽王驪山下潘岳西征賦曰履犬戎之侵地疾幽王之詭惑舉偽烽以沮衆淫嬖褒而縱慝軍敗戲水之上身死驪山之北赫赫宗周滅為亡國陰盤

城在縣東北一十四里漢縣事見上兩京地里記湯泉
水陰盤故城東門外去昭應十五里故城漢高祖與太
上皇所置新豐邑漢靈帝改封段熲盤侯即此是陰盤
城高一丈三尺東西南北各三千一百步往來大路必
由此城行人憧憧無所留礙近古帝王未嘗經過必迂
迴城西別開御路貞觀中乘輿將自東門入湯泉水岸
深數丈時水暴漲平岸又見物狀如豬出臨門命有司
致祭其物起向北因失所在開元八年冬乘輿自南入

行至半城黑氣自城東北角起倏忽滿城從官皆相失
上策馬踰城赴官路下至渭川雲氣稍解侍臣分散尋
求乘輿所在既謁見悲喜迸涕上亦悵然自是還宮數
日不出翰林學士通事舍人王翰作答客問上之詞曰
龍躍湯泉雲漸迴龍飛香殿氣還來龍潛龍見雲皆應
天道常然何問哉

新豐故城在縣東北十八里

昌陵故城漢成帝鴻嘉元年以新豐戲鄉為昌陵縣師

古曰戲水之鄉

白鹿觀在縣西南一十五里驪山中本驪山觀有老母
殿唐高祖武德六年幸溫泉傍觀川原見白鹿遂改觀名
太玄觀兩京道里記曰唐武德二年置在驪山下開元
二十七年以宮牆逼近難於展敬乃令諫議大夫道士尹
愔徙之今在宮北一里

靈臺觀在零口店北二百步兩京道里記曰天寶初供
奉睦霞奏置

寶雲寺在零口鎮市東坡上臨零口去縣三十六里隋
開皇中置號靈巖寺唐會昌五年廢咸通六年再置名
鷲嶺寺太平興國六年改持國寺津陽門詩注曰本名
慶山寺德宗時改寺有緣閣複道而上武后朝以禁匠
取宮中制度結構之

福巖寺兩京道里記曰在縣東五里南山半腹臨石甕
谷有懸泉激石成臼似甕形因以谷名名石甕寺太平
興國七年改津陽門詩注曰石魚巖下有天然石其形

如甕以貯飛泉故玄宗以石甕為之寺名寺僧於上層
飛樓中懸轆轤斜引脩絙長二百餘尺以汲甕泉出紅
樓喬樹之杪開元中以造華清宮餘材脩繕佛殿中有
玉石像幽州所進與朝元閣道像同至精巧無比叩之
如磬餘像並楊惠之塑脫空像皆元伽兒之製妙極纖
麗曠古無儔紅樓在佛殿之西巖下臨絕壁樓中有玄
宗題詩草八分每句一體王維山水兩壁

寺前有孔雀
松下有赤荻

岑入土千年
則成琥珀

靈臺祠在縣東南三十里即秦始皇祠也三秦記曰驪山顛有始皇祠不齋戒而往即風雨迷道強殛死之兩京道里記曰到彼即下視諸山有羲軒已降形唐王璵請於昭

唐縣南三十里山頂置太華上宮露臺祠石婆父祠疑是此然三秦記已有之未詳

秦始皇廟在縣東一十五里會德鄉

李真人廟兩京道里記曰真人名順興後魏時得道於此津陽門詩注曰順興後周時修道此山神堯傳禪真人潛告符契至今山下有祠宇周幽王陵在縣東北二

十五里兩京道里記曰陵高一丈三尺周三百步

秦始皇陵在縣東一十五里史記始皇初即位穿治鄠

山及并天下天下徒送七十餘萬人穿三泉下銅

徐廣曰一

作錮錮而致槨宮觀百姓奇器珍怪徙藏滿之今匠作

機弩矢有所穿近者輒射之以水銀為百川江河大海

機相灌輸上具天文下具地理以人魚膏為燭

徐廣曰人

魚似鮎四脚度不滅者久之二世曰先帝後宮非有子者出

焉不宜皆令從死死者甚眾葬既已下或言工匠為機

藏皆知之藏重即泄大事畢已藏閉中羨下外羨門盡

閉工匠藏者無復出者樹草木以象山漢書劉向傳秦

始皇帝葬於鄜山之阿

師古曰阿謂山曲也

下錮三泉上崇山墳

其高五十餘丈周回五里有餘石槨為游館

李奇曰槨中為游戲

之觀也師古曰多累石作槨於墳中以為離宮別館也

人膏為燈燭水銀為江海

黃金為鳬鴈珍寶之藏機械之變

孟康曰作機械木人之屬盡其巧變也晉

灼曰工匠為機械皆知之已下閉門皆殺工匠也

棺槨之麗宮館之盛不可勝

原師古曰言不能盡其本數

又多殺官人生葬工匠計以萬數天下

苦其役而反之驪山之作未成而周章百萬之師至其

下矣

師古曰周章陳勝之將

項籍燔其宮室營宇往者咸見發掘

師古曰言至其墓所者發掘之而求財物也

其後牧兒亡羊羊入其鑿

師古曰鑿

謂所穿冢藏者音在到反

牧者持火照求羊失火燒其藏擲自古至

今葬未有盛如始皇者也數年之間外被項籍之災內

離牧豎之禍

師古曰離遭也

豈不哀哉是故德彌厚者葬彌薄

知愈深者葬愈微無德寡知其葬愈厚丘隴彌高宮廟

甚麗有掘必速由是觀之明暗之效葬之吉凶昭然可

見矣賈山傳秦始皇死葬乎驪山吏徒數十萬人

師古曰吏

以督領徒

曠日十年

師古曰曠空也廢也言為重役空廢時日積年歲也

下徹三

泉

師古曰三重之泉言其深也

合采金石冶銅錮其內漆塗其外

師古

曰錮謂鑄而被以珠玉飾以翡翠中成觀游上成山林合之也音固

為葬殯之侈至於此使其後世曾不得蓬顆蔽冢而託

葬焉

師古曰顆謂土塊蓬顆言塊上生蓬者耳舉此古以對冢上山林故言蓬顆蔽冢也顆音口果反

史考曰秦始皇使刑徒七十萬人作驪山北山石為碣

水經注曰項羽入關發之以三十萬人三十日運物不

能窮關東盜賊銷擲取銅牧人取羊燒之火延十日不能滅國志曰始皇陵有銀蠶金鴈以多奇物故俗云秦王地市關中記曰秦始皇陵在驪山之北高數十丈周六里今在陰平縣界此陵雖高大不足以消六十萬人積年之功其用功力或隱不見不見者驪山水泉本北流北流者陂障使東西流又此土無石於渭北諸山運取大石故其歌曰運石甘泉口渭水為不流千人一唱萬人相鈎今陵下餘石大如覆土屋其消功力皆此類

也三輔故事曰始皇陵七百步以明珠為日月魚膏為脂燭金銀為鳧鴈金蠶三十箔四門施徹奢侈大過六
年之間為項籍所發兩京道里記曰陵高一千二百四
十尺內院周五里外院周十一里俗呼當陵南嶺尖峯
作望峯言築陵望此為準

始皇太子扶蘇墓在縣東南三十四里墓崇九尺後漢
馮衍墓在縣東十四里墓崇二丈

唐奉天皇帝齊陵在縣東一十六里旌儒鄉新豐店西

唐文敬太子惠昭太子二陵在縣東一十五里旌儒鄉
恭哀太子陵在縣境

莊恪太子莊恪陵在驪山北原

贈太尉段秀實墓在縣西一十五里

僧一行葬塔在銅人原明皇幸溫湯過其塔前駐馬徘徊

鄠

鄠縣

唐畿今次畿東北至府六十五里

本夏之扈國也尚書啓與有扈

戰于甘之野孔安國曰甘有扈郊春秋左氏傳夏有觀

扈杜預曰始平鄠縣有扈鄉帝王世紀曰扈至秦改為

鄠

姚察漢書訓纂曰按扈改鄠二字一也古今字不同耳

甘亭殷為崇國文王伐

崇是漢志鄠縣屬右扶風

有扈父亭

晉屬始平郡後魏太平

真君七年屬京兆郡自漢至隋皆於鄠城置縣即今縣

北二里故城是大業十年徙今治縣境

東西五十二里南北一百里

五鄉管五里

唐二十四鄉漢有長水鄉餘不傳

宜善鄉連縣郭管陳平里

扈亭鄉在縣西北一十二里管甘泉里

太平鄉在縣東一十五里管仁讓里

負陽鄉在縣西一十三里管五蔭里

珍藏鄉在縣北一十二里管貨泉里

縣城周二里二十四步

甘泉鎮在縣西北三十里

秦渡鎮在縣東四十里

一作十五里

馬祖壇在縣東北三十二里龍臺中澤

驛在縣北門內東北去本府秦川驛七十里西至盤屋縣驛七十里

終南山在縣東南二十里

雞頭山在縣東南三十里十六國春秋曰苻生不能守長安欲西上隴山士卒散盡遂入雞頭山尋為追兵所害

牛首山在縣南二十三里南接終南山在上林苑中西京賦曰繞黃山而款牛首山海經曰牛首之山有鬼草

其葉如葵赤莖其秀如禾服之使人不憂

三輔黃圖曰甘泉二宮中

有牛首山

五林山在縣境漢書曰鄠有五林

接近世僧院有在重雲山紫閣山雲際山

白雲山者此並不載

渭水北去縣十七里

豐水經縣東二十八里北流入渭

玉水北過上林苑入渭

澇水在縣西二里說文曰澇水出扶風鄠北入渭山海

經曰牛首之山澇水出焉西注於湍水多飛魚狀似鮒
可已痔疾李善注文選曰澇水即澇水也漢書注顏師
古曰澇音牢亦水名出鄠縣西南山澇谷而北流入于
渭

高觀谷水在縣東南三十里闊三步深一尺其底並碎
砂石北流入長安縣界合豐水

太平谷水在縣東南三十里闊七步深二尺其底並碎
砂石北流入長安縣界合豐水十道志曰太平谷水一

名林谷水即清水

水一作渠

之上流也源亦出終南山檀谷

水十道志曰長樂渠之上流也源出縣南終南山檀谷

甘谷水在縣西南二十二里闊三步深一尺其底並碎
砂石北流入興平縣界合渭水

耿谷水在縣西南三十里闊三步深一尺其底並碎砂
石北流入興平縣界合渭水

扈陽谷水十道志曰一名扈水又名馬腹陂水水經注
曰扈水上承扈陽池

沒猪泉在縣東南其源澄湛俗傳昔有野猪沒而為泉
圖經曰按說文猪即豬也水所停曰豬尚書禹貢曰大
野既猪亦曰彭蠡既豬滎波既豬皆由水所停爾又曰
黑水西河為雍州終南惇物至於鳥鼠原隰底績至於
豬野今鄠縣實終南之隈沒汨沒也蓋泉澤即水所停
爾而俗神之非也今傍有禹廟

漢陂在縣西五里出終南山諸谷合朝

一作胡

公泉為陂

十道志曰有五味陂陂魚甚美因誤名之本屬奉天又

說文曰漢陂在京兆鄠縣其周一十四里北流入潞水
唐寶曆二年勅漢陂令尚食使收管不得雜人採捕其
水任百姓溉灌勿令廢碾磑之用文宗初詔並還府縣
龍臺驛在縣東北三十里周二十五里有唐馬祖壇在
其中十道志上林有龍臺觀上林賦曰登龍臺掩細柳
是萬輿記在豐水西北近渭

八部澤在縣東南一十八里周五十里

滿地灤在縣東北二十八里周三里即高水上源東北

流入長安縣界馮席村

甘亭在縣西南五里續漢書曰在甘水之東長水鄉漢

有營校之地胡騎所屯

劉屈
氂傳

文殊臺一在縣東三十里

論公臺在縣西南五里

望仙臺在縣西三十里

新羅王子臺在縣東南六十里

縣故城在縣北一里即漢鄠城也周四里縣枕終南山

澧鎬二水合流入渭山水之勝甲於秦中故班孟堅西
都賦曰商洛緣其隈鄠杜濱其足鍾官城又名灌鍾城
在縣東北二十五里秦始皇收天下兵器銷為鐘簴處
周鄠宮在縣東五里

秦賓陽宮在縣西南二十三里

隋太平宮在縣東南三十里對太平谷

隋甘泉宮在縣西南二十二里對甘泉谷

漢宜春觀在縣境

逍遙禪寺在縣東南三十里後秦弘始三年置

雲際山大定寺在縣東南六十里隋仁壽元年置為居

賢捧日寺本朝太平興國三年改寺內有李順興先生

石記云順興初居長

安大統鄉昆明池南居賢村為周太祖所重令以所居
村置寺以居賢人號居賢寺因名村為居賢村順興自
魏武之始隱居北山念持金剛經聚疊瓦塔以記經數
於南北三嶺時稱為中南仙也其地舊有寺周武末寺
廢至大業中乃以此地賜騎馬都尉吳國公尉遲安為
柴莊安嘗見一老人素服謂安曰此古寺地何不再葺
之安遂來置寺因掘
地得順興石像焉

周王季冢在南山

漢陳平墓在縣南十里

長安志卷十五

欽定四庫全書

長安志卷十六

宋 宋敏求 撰

縣六

藍田 醴泉

藍田

藍田縣唐畿今次畿東北至府八十里秦舊縣也竹書紀年曰梁惠王

命太子向為藍田君水經注曰藍田縣蓋子向之邑漢書曰藍田縣秦孝公置山出美玉周禮曰玉之美者曰

球其次曰藍三秦記曰蓋以縣出美玉故名藍田按縣秦屬內史漢屬京兆尹後魏太武帝太平真君七年省縣孝文帝太和十一年復置隸京兆郡後周閔帝二年析縣置玉山白鹿縣以三縣置藍田郡武帝建德二年省郡廢玉山白鹿入藍田以隸京兆自縣西三十里故城徙嶢柳城今治是也唐武德二年析置白鹿縣三年更曰寧民又析藍田置玉山縣貞觀三年皆省

縣境

東西八十里
南北一百里

四鄉管四里

唐二十三鄉有節婦鄉餘不傳

奉道鄉連縣郭管安仁里

玉山鄉在縣東一十里管嚴朱里

白鹿鄉在縣西南二十里管安道里

盧珍鄉在縣西北一十里管康和里

縣城本名嶢柳城以前對嶢山其中多柳因取為名水經注曰泥水歷嶢柳城南魏置青泥軍於城內俗亦謂之青泥城晉中興書曰桓溫伐苻健遣京兆太守薛珍

擊青泥城破之即其處也城周八里今縣城但存東南一隅而已周三里餘八十步崇一丈六尺凡三門

青泥驛在縣郭下

藍田驛在縣西北二十五里

韓公堆驛在縣南二十五里

作桓公驛者非

藍橋驛在縣東南四十里

翟平驛在縣南五十五里

以上五驛並廢

玉谿館在縣東南四十五里入商州路俗曰磴子平藍

田關在縣東南九十八里即秦峽關也漢書曰趙高遣

將將兵距峽關

應劭曰峽音堯峽山之關李奇沛公引曰在上洛北藍田南武關之西

兵繞峽關踰黃山擊秦軍大破之後周明帝武成元年

徙青泥故城側改曰青泥關武帝建德三年改曰藍田

關因縣為名隋煬帝大業元年徙復舊所即今關是

終南山在縣南七十里

藍田山在縣東南三十里范子計然曰玉美出藍田一

名覆車山郭緣生述征記曰山形如覆車之象其山出

王亦名玉山後魏風土記曰山巔方二里聖賢仙隱之處劉福鳴學道於此下有神祠甚嚴灞水之源出藍田谷西又有尊盧氏冢次北有女媧氏谷則知此地是三

皇舊居之所

帝王世紀曰尊盧氏赫胥氏後

魏略曰劉雄鳴藍田人少

以採藥射獵為事常居覆車山每晨夜出行雲霧中識其道不迷時人因謂之能為雲霧晉太康地記曰藍田出美玉故曰藍田括地志曰臣秦案聖賢冢墓記驪山之陽多美玉今縣西北四十里有驪山即此山之北阜

驪山之陽或謂此也

黃山在縣東南二十五里事見上

鄭氏曰黃音匱蘇氏曰黃音蒯師古曰蘇音

是也丘
在反

倒虎山一名玄象山在覆車山北苻堅時王子年始隱于東陽谷後避石季龍之亂徙於此

嶢山在縣南二十里

虎侯山在縣境

出地
道記

金山在縣南一十里

七盤山在縣南二十里

王順山在縣東南二十里舊圖經曰昔道人王順隱此山得道

阜兒山在縣東六十里鄉俗所傳嘗有一禽止此山衆禽隨之疑為鳳也因名鳳兒山語訛作阜兒山

白鹿原在縣西五里三秦記曰周平王東遷有白鹿遊於此原以是得名蓋秦運之象其原接南山西北入萬年縣界抵涇水晉書苻雄與桓沖戰于白鹿原

晉中興書

曰桓溫伐苻健督護鄧
遐等奮擊於白鹿原

涼風原

一作風涼

在縣西南四十五里南接石門山北入萬

年縣界遁甲開山圖曰驪山之西川有阜名曰風涼原

亦雍州之福地即硯山之陰也水經注曰狗枷川水有

二原西川水出硯山之研盤谷與若谷二水合而東北

流涼風原橫嶺在縣北三十五里自臨潼驪山東入縣

界橫接華州界

桓公堆在縣南二十五里晉書桓溫伐苻健遣苻雄等

拒溫於秋思堆後因名桓公堆

絳坡在縣東南通典曰七盤十二絳藍關之險路也

傾谷在縣東五十里

同谷在傾谷之西

倒回谷在縣東南五十里灞水上源出此谷谷內通商

州洛南縣界

藍谷在縣東南二十里

輞谷在縣西南二十里

採谷在縣西南三十里與輜谷並有細路通商州上洛縣

石門谷在縣西南四十里

唐昭宗乾寧二年行莎城鎮又次石門鎮之聖壽寺

庫谷在縣西南五十里谷有關

霸谷

一作

古滋水也亦名藍田谷水即秦嶺水之下流

也東南自商州上洛縣界流入漢書曰霸水出藍田谷北入渭師古曰滋水秦穆公更名以章霸功水經注曰霸者水上地名也水出縣之藍田谷三秦記曰有川方

三十里其水北流出玉銅鐵石圖經曰其源出縣東南秦嶺倒回谷西北流九十里出縣界入萬年縣界騫村

岸闊六十尺

十道志霸水源出終南山金谷

金谷水出縣西南終南山之金谷水經注曰水東北流注澹水又北流歷藍田川北注于霸

劉谷水一名泥水出縣東南劉谷水經注曰水出藍田山之東谷俗謂之劉谷西北與石門水合銅谷水出縣東銅谷水經注曰石門谷東有銅谷水合輕谷水西注

泥水

白馬谷水出縣東白馬谷南流經縣南又西北流入霸水

句牛谷水出縣西北句牛谷西南流入霸水圍谷水又有岐谷水出縣西南岐谷南流入霸水狗枷東川水出縣西南終南山水經注曰上有狗枷堡秦襄公時有天狗來下有賊則狗吠之一堡無患故川得名焉又曰狗枷東川水出南山之石門谷次東有益谷次東有大谷

次東有雀谷次東有土門谷五水合而西北流歷風涼原入萬年縣界

荆谷水自白鹿原東流入萬年縣唐村界

輞谷水出南山輞谷北流入霸水

藍谷水南自秦嶺西流經藍關藍橋過王順山水下出藍谷西北流入霸水

傾谷水自秦嶺出南流入霸水

採谷水自秦嶺出北流三十里入萬年縣界

石門谷水自秦嶺出北流三十里入萬年界

庫谷水自南山出北流入萬年界合澮水

蓼子澗在縣南三里出南山西北流合輞谷水入霸水

咽瓠泉在縣西北一十五里舊圖經曰唐李筌於此遇

驪山老母說陰符經傳教既畢令筌取水筌乃攜瓠就

泉汲水已失老母因名咽瓠泉桂泉在縣東北四十里

泉畔舊有桂一株

唐武德六年寧民令萌昶引南山水入京城

冰池在縣東南六十里唐鑿冰之所

淹池在縣東北三十五里

石門湯在縣西南四十里石門谷口舊圖經曰唐初有異僧止于此大雪其地雪融不積僧曰必溫泉也掘之果有湯泉湧出遂置舍兩區凡有病者浴多痊嗣後有白魚之瑞復神女頻降遂立玉女堂於湯側明皇時賜名大興湯院

昆吾亭在縣境漢宣帝霍皇后葬亭之東

藍田故城在縣西三十里

白鹿故城在縣西十一里

周王山故城在縣東二十五里

唐王山故城在縣東四十三里有萬金堡

寧民故城在縣西南三十二里

青泥城在縣南七里案嶢柳城亦謂之青泥城即今縣是也未詳復有此城

思鄉城一名柳城在縣東南三十三里舊說宋武帝入關築城於此南人思鄉因名之又以城傍多柳故曰柳

城

尚可堡在縣東今存

明市堡在縣西南四十里

雞子堡在縣北四十里土坡狀如雞子因以為名

黃櫨堡在縣北三十里

漢御羞苑鼎湖宮皆在縣境

唐萬泉宮儀鳳三年建

萬金宮在縣東四十五里天耀三年詔新造涼宮為萬

金宮

高宇遺言萬金芳桂奉天壽宮並傳廢文明元年武后詔奉天宮置道士觀芳桂萬金各置僧寺以

舊宮
為名

勝因寺即唐法池寺也在縣城內舊圖經曰寺舊有池故以名張說有藍田法池寺二法堂讚建中中改通靈寺後又改今名

崇法寺即唐悟真寺也在縣東南二十里王順山白居易有詩述其靈及後改名

永福寺在縣西南三十五里本唐神堯山莊

崇仁寺在縣東北四十里唐開元二十六年置

清源寺在縣南輞谷內唐王維母奉佛山居營草堂精舍維表乞施為寺焉

虎候山祠漢書曰秦孝公置

金山神廟在縣南十里輞谷口金山之前舊圖經曰黃帝時風后滅蚩尤之衆於此蓋風后之祠濟衆侯廟在縣東南五十里倒回谷其神名石門將軍唐京兆尹第五琦楊知至祈雨有應至乾符中歲旱詔使致禱應時

霑霈遂封濟衆侯增葺廟宇今榜助順王未詳

都神廟在縣城內會縣境諸神歲時饗於此

黃崖神廟在縣東五十里傾谷口

古華胥氏陵在縣西三十里

荆軻冢在縣西北三十里

鷺子冢在縣東八里漢書曰臨江閔王榮景帝太子廢
為臨江王坐侵廟墺地為宮上徵榮將行祖於江陵北
門既上車軸折車廢江陵父老流涕竊言曰吾王不反

矣榮至詣中尉簿責訊王王恐自殺葬藍田有數萬鶩
銜土置冢上百姓憐之世名鶩子冢

賀若婦冢在縣西南一十五里婦縣人也姑有疾刲股
肉奉姑疾遂愈府縣以聞勅旌表門閭名其鄉為節婦

鄉志未載歲
月疑唐事

醴泉

醴泉縣

唐次赤今次畿東
南至府九十里

本漢左馮翊谷口縣地在九

峻山東仲山西當涇水出山之處故謂之谷口今縣東

四十里谷口城是王莽曰谷喙後漢魏晉為池陽縣後
魏武帝於谷口置溫秀寧夷二護軍改池陽為寧夷縣
隸咸陽郡西魏置寧夷郡後周改為寧秦郡隋開皇十
八年改寧夷縣為醴泉縣隸京兆郡以縣界有漢醴泉
宮因以為名

方輿記曰漢宣帝時開泉味如酒故以名縣亦漢宮之名也

其城即古

仲橋城也唐武德元年析置溫秀縣

按縣北有溫秀嶺當以此為名後

省醴泉貞觀十年營昭陵在九峻山析雲陽咸陽二縣
後置醴泉縣隸雍州天授元年隸鼎州大足元年還隸

雍州廣德元年昇為赤

縣境

東西六十二里
南北一百二里

六鄉管二百五十村

唐十六鄉有白鹿長樂
瑤臺修文四鄉餘不傳

美華鄉在郭下管村四十四

通時鄉在縣西北六里管村二十四

新望鄉在縣西一十二里管村三十

崇孝鄉在縣東北一十五里管村四十九

神安鄉在縣西北三十里管村五十四

白涇鄉在縣北五十里管村四十九

縣城周二里餘一百步

醴泉鎮在縣城內

北醴泉鎮在縣北二十里

按今有甘北鎮疑是此

醴泉驛在西門內東南至咸陽驛四十五里西北至乾州奉天驛七十里今廢

名光渡在縣東北三十五里

涇甘渡在縣東北三十里

九峻山在縣西北四十里漢書地理志曰谷口縣九峻山在西四夷郡國縣道里記曰九峻山東連仲山西當涇水出焉高六百五十丈周十五里

武將山在縣西北五十里

一名憑山

芳山在縣東北五十里

一作萬山

覆甌山在縣東北四十五里

承陽山在縣西北七十里山有石泉三輔黃圖所謂浪水

無勞山在縣西北六十里

溫宿嶺在縣北漢時溫宿國人令居此地田牧因以為

名

隋志作
溫秀

甘谷在縣西八十里

泥泉谷在縣西北三十里

石泉谷在縣西北六十里

西水谷在縣北七十里

承陽山兩水谷在縣西七十里

豆盧谷在縣西北八十里

黑狗谷在縣西北九十里

巴谷在縣西北九十里

白水谷在縣西北一百里

涇水自乾州永壽縣西北流入縣界尚書禹貢曰涇屬

渭汭

屬隸也水北曰汭言治水注入渭

毛詩曰涇以渭濁湜湜其汴春

秋左氏傳襄公十四年曰諸侯之大夫從晉侯伐秦以

報櫟之役濟涇而次秦人毒涇上流師人多死

以毒藥投涇水

之上流晉師
飲水多死

史記曰秦二世夢虎噬左驂殺之卜涇為

崇二世乃齋望夷宮而欲祀之漢書曰涇雖不在大川
之祀以近咸陽得此大川之祀漢書注顏師古曰涇水
出安定涇陽笄頭山東至陽陵入渭益部耆舊傳曰漢
武祀甘泉至涇橋有女子浴於涇水乳長七尺上恠遣
問之女曰帝後第七車知我時侍中張寬在第七車對
曰天星主祭祀齋戒不潔則女人星見水經注曰涇水
導源安定朝那縣西笄頭山秦始皇巡地西出笄頭山

即是山也蓋大隴之異名

按漢武故事張寬所對並云渭橋渭水北史曰苻堅以關

中水旱不時議依鄭白故事發其王侯已下及豪望富室僮隸三萬人開涇水上源鑿山起隄通渠引續以溉

斥鹵之田百

姓賴其利

甘河自縣西北甘北鎮西來至縣東北涇甘渡合入涇水谷口城在縣東北四十里漢縣也溝洫志曰田於何所池陽谷口即此城也郊祀志公孫卿言黃帝昇仙於寒門水經注曰九峻山東仲山西謂之谷口即古寒門也按雲陽縣谷池水所出謂之谷口未詳孰是

紫府觀在縣東北三十里唐太宗為道士薛頤置今廢
瑤臺寺在縣西北昭陵之西

要冊三廟一在市北一在縣西二十里一在縣西三十

五里

按漢志有天齊公祠玉牀山祠
五帝祠五所圖經皆不著

唐太宗廟在縣西門外去縣一里

肅宗廟在縣西北三十五里

開寶勅云去甘
北巡鎮三里

太宗昭陵在縣西北五十里

陵廟記在縣
東三十里

九峻山白鹿長樂瑤臺三鄉界古逢南村下宮去陵一

十八里

元和郡縣圖志曰在縣東北二十五里

封內周一百二十里陪葬諸王七

蜀王愔趙王福紀王慎越王貞嗣紀王登

曹王明
蔣王暉
公主二十一

清河公主駙馬都尉程懷亮晉安章思安豫章唐義識新興長孫曦

蘭陵寶懷慈高密段綸長樂長孫冲遂安王大禮南平

劉玄意衡陽阿史那社介新城韋正矩城陽薛曜安平

楊思敬襄城蕭銑長沙豆盧懷讓安康獨孤妃嬪八

譙臨川周道務普安史仁表晉陽汝南常山妃嬪八

夫人彭城夫人紀國太妃韋氏越國太妃燕氏趙

國太妃楊氏賢妃鄭氏才人徐氏竇卿妹石塔宰相

一十三

中書令馬周岑文本崔敦禮司徒英國公李勣尚書左僕射魏國公李靖右僕射虞國公溫彥

博右僕射宋國公蕭瑀左僕射申國公高士廉左僕射梁國公房玄齡太子太師鄭國公魏徵高陽公許敬宗

右僕射萊國公杜如晦 丞郎三品五十三戶部尚書莒
太尉趙國公長孫無忌

部侍郎馬載戶部尚書武陽縣公李元亮衛尉卿齊國
公房仁裕禮部尚書張後肩國子祭酒孔穎達禮部侍
郎孔志亮工部侍郎孔元惠散騎常侍褚亮祕書監永
興公虞世南工部尚書閻立本吏部尚書姜晦中書舍
人杜正倫殿中監唐嘉會學士姚思廉衛尉卿魏叔王
光祿卿姜遠祕書監岑景倩宗正卿李芝芳光祿卿房
光義衛尉卿房光敏子閬州刺史盧貞松天策府記室薛收宗正
卿段倫金紫光祿大夫長孫璿贈吏部侍郎安康伯太
史令薛績銀青光祿大夫李震洪州刺史吳黑闥晉州
刺史裴藝寧州刺史竇義節衛州刺史蕭業吏部郎中
馬顥幽州都督平元公長孫敞原州都督李政明臨淮
公李規琅邪公李珍常山公李清千金公李俊中山公
李裾汝州別駕房左清道率房回江夏郡王道宗夔國

公劉洪貞雍州長史李弼特進觀國公楊仁恭原州都督史幼虔陝王府司馬謙芮國公豆盧行業西平郡王李琛簡州刺史建寧功臣大將軍以下六十四大將軍公李安南都督姜簡阿史那忠開府儀同三司鄂國公尉遲敬德右驍衛大將軍嘉川縣公周護仁鎮國大將軍丹陽公李客師大將軍鴈門公梁建方左鎮衛大將軍號國公張仁貴左武衛大將軍翼國公秦叔寶大將軍周國公鄭仁泰益州都督王愔輔國大將軍劉弘基武衛大將軍申進達孫武達丘行恭阿史那余鉢苾金吾大將軍梁儼左衛大將軍阿史那社介監門大將軍仇懷古大將軍薛吐摩芝大將軍蘇花熟大將軍漢東公李孟常光祿大夫芮國公豆盧寬大將軍尉遲竇林大將軍阿史那道真左武衛大將軍天水郡公丘行恭金紫光祿大夫賀蘭整大將軍張太師冠軍大將軍許洛仁大將軍張延師大將軍琅邪王沖右衛大將軍史大奈左武衛大將軍

懷德縣公牛伯億左金吾大將軍梁仁裕左屯衛大將軍金水郡公姜確左監門大將軍王波利大將軍公孫雅靖大將軍可汗阿史那步真大將軍史弈大將軍李蒜大將軍阿史那德昌右監門將軍龔善左金吾將房先忠內侍將軍張阿難黃野軍都督拔野鉢都督渾大寧阿史氏祔將軍盧國公程知節子闕玉尉遲母阿史那氏祔將軍仇務薦右武衛大將軍懷寧縣公杜君綽將軍麻仁靖右監門大將軍賀拔儼將軍魯何道將軍楊思訓將軍元仲父將軍豆盧承其將軍解斯正貴將軍徐定盛將軍康乂安將軍報志玄將軍薛萬均將軍元思賢將軍李承祖中郎薛承慶右郎將尉遲巡昱右衛郎將姜中郎將段存爽按陵廟記圖然所載陪葬諸臣姓名差舛恐未得其詳或有不當陪葬者更須叅校乃善

所乘六駿石像在陵後

青驩平竇建德時乘

讚曰足輕電影神發天機策茲飛練定我戎衣什伐赤平

王世充竇建德時乘

讚曰渥涸未靜斧鉞申威朱汗
騁足青旌凱歸有中四箭處特勒

驃平宋金剛時乘

讚曰應策騰空承聲半
漢入險摧敵乘危濟難颯露紫平東

都時乘

讚曰紫驚超躍骨騰神
駿氣驚三川威凌八陣拳毛騮平劉黑闥時乘有

石真容自拔箭處

讚曰月精按轡天駟橫行弧天
載戢氛埃廓清有中九箭處白蹄

烏平薛仁果時乘

讚曰倚天長劍追風駿
足聳轡平隴回鞭定蜀寢宮在山上

元無井泉百姓供水勞弊後經野火徙瑤臺寺側葺行

宮貞元十四年欲就寺側修復之以移改舊制訪近臣

集議然後葺焉

肅宗建陵在縣東北一十八里武將山修文鄉劉村四
十里下宮去陵五里陪葬功臣一尚父汾陽王郭子儀



長安志卷十六